

## Evening Dogri News Bulletin, 24 May 2024

इवनिंग डोगरी न्यूज़ बुलेटिन

समे-18:15 Hrs

### Headlines

- 1 अनंतनाग-राजौरी-पुंछ संसदी हल्के च कल वोट पाए जाने ना मतदान दे मद्देनजर समूलचे पीर पंचाल खित्ते च सुरक्षा दे निग्गर बंदोबस्त कीते गेदे ना।
- 2 प्रधानमंत्री नरेंद्र मोदी होरें आखेआ ऐ जे लोकसभा चुनावें दरान कश्मीर च मतदान दी प्रतिशत च खरा मता बाद्दा दिक्खना उंदे आस्तै बड़ी गै संदोखै आहली गल्ल रेई ऐ।
- 3 राश्ट्री सुरक्षा सलाहकार अजीत डोभाल होरें आखेआ ऐ जे भारत बड़ी तेजी कन्नै बदलै करदा ऐ ते अगले 10एं बरें च एह 10 ट्रिलियन डॉलरें आली इक बड़ी अर्थ बवस्था पक्क गै बनी जाह्ग।
- 4 मौसम विभाग नै 5 होर दिन जबरदस्त गर्मी जारी रौहने दी पेशनगोई कीती ऐ। बच्चें ते बुजुर्गें गी धुप्प च नेई जाने ते खरी मती मात्रा च पानी पींदे रौहने दी सलाह बी जारी कीती गेई ऐ।

<><><><><><>

### Voting-Tomorrow

लोकसभा दे 6में गेड दे चुनां तैहत कल जम्मू-कश्मीर दे अनंतनाग-राजौरी-पुंछ पालियामानी हल्के लेई वोट पाए जाने ना मतदान दे कम्मै गी रमानदारी ते बवस्था आले ढंग्गै सिर करोआने लेई सुरक्षा दे निग्गर बंदोबस्त कीते गेदे ना। बन्ने आले जिले पुंछ ते राजौरी च चुनां आले ध्याडे ते होरनें चुनावी गतिविधिएं लेई सुरक्षा एजेंसिएं सब्बै प्रबंध जकीनी बनाई लैते दे ना। मतदान गित्तै बहु आयामी रणनीति ते निग्गर सुरक्षा योजना बनाई गेदी ऐ। सब्बनें मतदान केंद्रें गी दऊं श्रेणिएं च बंडुया गेदा ऐ। पैहली श्रेणी च ओकडे मतदान केंद्र न जेहडे सामान्य इलाकें च न जदके दुई श्रेणी च ओकडे मतदान केंद्रें गी रक्खेआ गेदा ऐ जेडे सुरक्षा दे लिहाज कन्नै संवेदनशील इलाकें च ना। एह ओकडे इलाके न जेडे दूर-दरेडे ते सुरक्षा दे लिहाज कन्नै किश चुनौतिएं भरोचे न ते इनें इलाकें च पिछले किश बरें दरान आतंकवादी घटनां बी पेश आई दिआं ना।

<><><><><><>

### Voting-Poonch

कल होने आले अनंतनाग राजौरी लोकसभा सीट च मतदान लेई ई.वी.एम ते पोलिंग स्टाफ गी पूरे पुंछ जिले दे 473 मतदान केंद्रें पर भेजी दिता गेआ ऐ। स्हाडे पुंछ आहले संवाददाता नै जानकारी दिती ऐ। स्हाडे संवाददाता कन्नै गल्लबात करदे होई पुंछ दे जिला चुनां अधिकारी यासिन एम. चौधरी होरें आखेआ।

<><><><><><>

### DM Poonch Holiday

मतदान दी प्रक्रिया च सरकारी मलाजमें दी बद्दोबद्द शमूलियत जकीनी बनाने दे मकसद कन्नै बन्ने आले जिले पुंछ दे जिला मैजिस्ट्रेट होरें कल 25 मई दे ध्याडे गी सब्बनें सरकारी मलाजमें लेई छुट्टी घोषित करी दिती ऐ। उआं चुनावी ड्यूटी लेई तैनात सरकारी मलाजम इस हुकम दे दायरे हेठ नेई औडन ते उनेंगी कल छुट्टी नेई होग। तोआई जिला मैजिस्ट्रेट होरें 23 शा 25 मई तगर जिले च ड्राई डे दा बी ऐलान कीते दा ऐ। इस हुकमै मुजब जिले च शराब ते इस चाल्ली दे होरनें नशीले पदार्थें दी खरीद ते बिक्री पर इस अवधि दरान पूरी चाल्लीं रोक होग। जिला मैजिस्ट्रेट होरें पुंछ जिले दे त्रोंणें असेम्बली हल्के सुरनकोट, पुंछ हवेली ते मेंडर च बनाए गेदे मतदान केंद्रें गी नो स्मोकिंग ज़ोन घोषित कीता ऐ। यानि इनें मतदान केंद्रें पर सिगरेट-बीडी पीने दी मनाही होग।

<><><><><><>

## PM-Modi

प्रधानमंत्री नरेंद्र मोदी हों आखेआ ऐ जे एल्लै चलै करदे लोकसभा चुनाएं च उंदे लेई सब्बनें शा संदोखै आहली गल्ल कश्मीर च मतदान दी प्रतिशत च खरा मता बाद्दा दिक्खना रेयी ऐ। इक मीडिया चैनल गी दित्ते गेदे इंटरव्यू च मोदी हों आखेआ जे कश्मीर च मतदान केंद्रें दे बाहर मतदाताएं गी लम्मी-लम्मी रीगें दिआं तस्वीरां हर कुसै गी उर्जा कन्नै भरी देडन। प्रधानमंत्री हों आखेआ जे उनेंगी इस गल्लै दा संदोख ऐ जे जम्मू-कश्मीर दी बेहतर भविक्ख लेई उनें जेहडियां गैह्णीं पुट्टियां न, उंदे सकारात्मक नतीजे सामने आवै करदे ना। ध्यानजोग ऐ जे 13 मई गी श्रीनगर च 39 फीसदी मतदान जदके 20 मई गी बारामूला हल्के च 59 फीसद मतदान दर्ज कीता गेआ ऐ। जम्मू-कश्मीर दी हुन छडी अनंतनाग-राजौरी सीट पर गै चुनां होने बाकी रेई गेदे ना। इस नशिस्तै लेई कल 25 मई गी वोट पाए जाने न ते इत्थें बी खरी मती गिनतरी च मतदान होने दी मेद कीती जा रदी ऐ।

<><><><><><>

## NSA-Ajit

राष्ट्री सुरक्षा सलाहकार अजीत डोभाल हों आखेआ ऐ जे भारत बडी तेजी कन्नै बदला करदा ऐ ते अगले 10एं बरें च एह 10 ट्रिलियन डालरें दी अर्थ बवस्था बनी जाग। उनें आखेआ जे एह भारत आस्तै बडी बड्डी उपलब्धि होग ते भारत दुनिया दी त्रीये नंबरै दी सब्बनें शा बड्डी अर्थ बवस्था बी बनी जाग। डोभाल हों आखेआ जे भारत कश दुनिया दा सब्बनें शा बड्डी कार्यबल होग। डोभाल हों सीमा सुरक्षा बल दे 21में अलंकरण समारोह ते रूस्तमजी मेमोरियल लैक्चर दे सरबंधै च नमीं दिल्ली दे विज्ञान भवन च लोआए गेदे इक कार्यक्रम गी संबोधित करै करदे हे। उनें आखेआ जे तकनीकी तौर पर भारत सेमी कंडक्टर, आर्टिफिशल इंटेलिजेंस, माल तैयार करने, रक्षा ते सुरक्षा जनेय खेत्तरें च सब्बनें शा अगो चला करदा मुख्य होग। डोभाल हों देसै दे बन्ने दी राक्खी लेई बीएएएफ दे जोगदान दी सराहना कीती।

<><><><><><>

## IMD-Weather Forecast

भारत दे मौसम विभाग नै 5 दिनें लेई पंजाब, हरियाणा, राजस्थान, गुजरात ते पच्छमी मध्य प्रदेश च लू चलने दी मेद दस्सी ऐ। आकाशवाणी समाचार कन्नै गल्लबात करदे होई मौसम विभाग दे वरिष्ठ वैज्ञानिक आर.के जेनामनी हों आखेआ जे इनें इलाकें दे लोकें गी तेज गर्मी थमां कोई राहत नेई थहोग की जे इनें इलाकें उप्पर चक्रवर्ती सर्कुलेशन दे कोई संकेत नेई हैन। उनें आखेआ जे तापमान 44 डिग्री सैल्यिस थमां 48 डिग्री सैल्यिस दे बश्कार रौहग। इसी दिक्खदे होई एजेंसी नै इनें इलाकें लेई रेड ते ओरेंज अलर्ट बी जारी कीता ऐ।

<><><><><><>

## J&K Heat Wave

जम्मू-कश्मीर केंद्र शासित प्रदेश च अगले 5 दिनें तर गर्मी दी लैहर जारी रौहने दी मेद ऐ। मौसम वैज्ञानिक नै लोकें गी आखेआ ऐ जे ओह मती गर्मी च बाहर नेई निकलन ते धुप्प दे संपर्क च नेई औन ते मता तरल पदार्थ पीन। स्हाढे जम्मू आहले संवाददाता दी रिपोर्ट मुजब मौसम विभाग नै आखेआ ऐ जे इनें 5एं दिनें दरान प्हाडी इलाकें च बी गर्म ते खुश्क मौसम रौहने दी मेद ऐ ते 28 मई तगर इयां गै मौसम रौहग। श्रीनगर च पिछली रातीं तापमान 15ण्0 डिग्री सैल्यिस दे मकाबले 15.4 डिग्री सैल्यिस दर्ज कीता गेआ हा जेहडा गर्मियें दी राजधानी लेई सामान्य थमां 3.7 डिग्री सैल्यिस मता ऐ। जम्मू च पिछली रातीं 29.1 डिग्री सैल्यिस दा निचला स्तर दर्ज कीता गेआ ऐ ते सर्दियें दी राजधानी लेई एह सामान्य थमां 3.2 डिग्री सैल्यिस थमां उप्पर ऐ।

<><><><><><>

## Reasi-Heat Wave

जम्मू संभाग दे बकख-बकख हिस्सें च तापमान 41 डिग्री सैल्यिस तगर पुज्जी गेदा ऐ। उआं कल ते अज्ज संझा बी मौसम किश बदलोखड़ा होने करी लोकें गी गर्मी शा बिंद हारी राहत थहोई ऐ पर अजें बी जम्मू संभाग दे मते सारे हिस्सें च गर्मी दा प्रकोप बरोबर जारी ऐ। गर्मी शा राहत हासल करने लेई लोक नैहरें, दरेयाएं आली थाहरें प जा करदे न। खरी मती गिनतरी च सैलानी इनें दिनें रियासी बी पुज्जा करदे न। उआं सहाड़े संवाददाता नै भारी गर्मी दे मद्देनजर बरते जाने आले एहतियात दे बारै च सरकारी अस्पताल दियासी दिएं डॉक्टर शीतल शर्मा हुंदे कन्नै खास गल्लबात कीती। डॉक्टर शीतल शर्मा होरें आखेआ।

<><><><><><>

## Amarnath-Workers

आगामी श्री अमरनाथ जात्तरा दी तैयारी लेई जम्मू शैहर च इक सौंदर्य अभियान चलाया जा करदा ऐ। स्मार्ट सिटी परियोजनाएं तैहत पूरे शैहरे च मरम्मत दा कम्म कीता जा रदा ऐ ते खासतौरा पर पूरे शैहरे दी दीवारें पर खूबसूरत पेंटिंग पर ध्यान दित्ता जा रदा ऐ। एहदा मकसद तीर्थ यात्रियें ते सैलानियें लेई इक्क आकर्षक ते स्वागतजोग माहौल बनाना ऐ। इनें पेंटिंग्स च शैहर दी समृद्ध संस्कृति गी बी दर्शाया जाग। अधिकारियें आश्वासन दित्ता ऐ जे एह कम्म समेंसिर पूरा होई जाग। साइट उप्पर कम्म करा रदे कारीगरें आकाशवाणी दे संवाददाता कन्नै गल्लबात करदे होई आखेआ।

<><><><><><>

## Amarnath-Yatra

आगामी श्री अमरनाथ जी जात्तरा दे यात्रुएं लेई लंगर आस्तै लंगर कमेटियां जम्मू-कश्मीर दे उधमपुर च जोरें कन्नै तैयारियां करा रदियां न। लंगर कमेटी आस्सेआ सारे इंतजाम जियां शेड ते होर जरूरी समेयान उधमपुर जिले दे Thard इलाके च कीता गेदा ऐ। मकामी युवा मुस्लिम बी लंगर कमेटी दा साथ देइए शांति ते भाईचारे दा सबूत देआ रदे न। इक लंगर कमेटी दे प्रधान राजपाल सुल्तान होरें आकाशवाणी कन्नै गल्लबात करदे होई आखेआ।

<><><><><><>

## Court-Holidays

जम्मू प्रांत दे समर ज़ोन च जिला किशतवाड़, डोडा, रामबन ते कठुआ गी छोड़ियै सारे जिला अदालतें च 10 जून थमां 24 जून 2024 तगर 15 दिनें गी गर्मियें दियां छुट्टियां होडन। जम्मू-कश्मीर ते लद्दाख दे हाई कोर्ट आस्सेआ जारी कीते गेदे इक आर्डर च आखेआ गेआ ऐ जे प्रिंसीपल जिला ते सत्र न्यायाधीश सरबंधत जिलें दे मुख न्यायिक मैजिस्ट्रेट्स कन्नै रलियै इस दरान जरूरी आपराधिक मामलें दे निपटारे दा प्रबंध अपने-अपने अधिकार क्षेत्रें च करने दी हिदायतां दित्तियां न।

<><><><><><>